

Tangada Agoago (Ecclesiastes)

Hanu dagodo o de beebaa nei

E dee iloo danuaa be goai ne siia de beebaa nei. Gai de mada e 1.1 e tala bolo “Ni muna nii Tangada Agoago, go tama daane a David, de hodoologi o Jerusalem,” gai teai se ingoo o tangada ne siia. Hanu e tala bolo go Solomon ne siia de beebaa nei i daha de ngadau e 935 B.C., i de hagaodi o dono mouli. De beebaa go *Ecclesiastes* e sisi ai maanadu a dahi “Dangada Agoago,” ia se daane e kona dana maanadu dagodo de bodobodo ma de hai ngadaa o de mouli nei, gai e dee heohi ma de hagadee paba mee e hai ai. Ia e donu ange bolo “Mee alodahi e deai donu haigamaiana” (1.2). Ia tee donu ange gi de hai a de Maadua, ne hagatau ai mouli o dangada. Aagai ia ne agoago ange dangada, gilaadeu gi hagammahi gi hai hegau, ma de malangilangi i mee a de Maadua gu ngadi gaavange gi gilaadeu, i taoolooa olaadeu mouli.

Maanadu lagolago a taane agoago nei e dee hagamalangilangi, gai e hagadaemaha. Aagai de beebaa nei ne dau madali beebaa o de Beebaa Dabu, e hagaago mai ai bolo de gai e haigamaiana ange gi maanadu ma lodo lagolago o de mouli nei. E soa dangada gu maamaane olaadeu lodo, i delaadeu gidee ada o olaadeu mouli i lo te beebaa go *Ecclesiastes*. Gai de Beebaa Dabu e hai gi dahi tali hagalodolodo a tangada ange gi de Maadua, go de ia e haia gi hanu haigamaiana o de mouli o

tangada.

Dahi gubu hagamogomogo: “Gidaadeu gu langona mee alodahi; gai aanei muna hagaodi: koe gi madagu i de Maadua ma de daohi ana hainga; deenei donu de hegau laumalie a tangada e hai” (12.13).

Denga vaevaenga

E hanu haigamaiana o de mouli? (1.1–2.26)

Hanu muna i dagodo o de mouli (3.1–11.8)

Agoago hagaodi (11.9–12.8)

Muna hagaodi (12.9-14)

Mee alodahi e deai donu haigamaiana

¹ Muna a Tangada Agoago,* go tama daane a David, de hodoologi o Jerusalem.

² E hagamoolau Tangada Agoago,
“E deai haigamaiana! E deai haigamaiana!
Mee alodahi e deai donu haigamaiana.”

³ Ni aha a tangada e mau i hegau alodahi aana e hagaduu ngae ma e hai i lalo de laa?

⁴ Dahi atangada e humai, gai dahi atangada gu hano,
aagai henua i lalo e dagodo ga hano ai.

⁵ De laa e sobo age ga lava ga danu,
gai e hagamoolau ga ahe gi dono mommee ne sobo age ai.

⁶ De madangi e ssau ga hano gi ngaage,
ga lava ga dahuli ga hano gi ngaiho;
gai de madangi e dahulihuli saele,
ga lava ga ahe ange i dono haiava mau.

* **1:1** *Tangada Agoago*, aabe go tangada e dagina i de hagabuni o dangada.

⁷ Denga saalingaa vai alodahi e ssali ga hulo gi tai, aagai tai e dee maua donu gi honu.

De mommee o denga saalingaa vai e loomai laa, gai go kilaa hogi olaadeu e aahe ga hulo aagena.

⁸ Mee alodahi e kona donu de hagadaalea, e hai ngadaa i de tala ono dagodo.

Luu ganomada e dee maua gi lava alaaau mee e tilo, luu dalinga e dee maua hogi gi lava alaaau mee e hagallongo.

⁹ Mee alodahi e duudagi naa donu huu bei de hai ne daamada ai,

mee gu lava i de hai e aahe ange naa ga hai; e deai donu mee hooi i lalo de laa.

¹⁰ E aha, e dahi laa mee a tangada e maua i de tala ga hagataba,

“Galo ange diiloo! De mee nei se mee hooi?”

De mee laa gu dagodo mai huu madagidagi; gai gu dagodo huu i mua taadeu masavaa.

¹¹ Gai dangada e dee manadua donu mee gu hai madagidagi,

gai dangada e loomai i muli mai e dee manadua naa hogi

e dangada e loomai i olaadeu dua.

De heiangi e deai ono haigamaiana

¹² Au, Tangada Agoago, nogo noho i Jerusalem ma e hoolooloo ai i Israel.

¹³ Au ne hagaduu ngae e ssala, gi donu ange au gi mee alodahi gu hai i lalo de langi. Gai se hegau hai ngadaa a de Maadua gu gaavange gi dangada gi haia.

¹⁴ Au gu gidee mee alodahi gu hai i lalo de laa; tilo, mee alodahi e deai donu olaadeu haigamaiana, gai e bei de ngadi doolohi a tangada de madangi.

¹⁵ De mee gu bigo laa e dee maua i de hagasoe, gai e dee maua i de dau mee e deai.

¹⁶ Au ne hagamadaba i ugu lodo, “Tilo, au gu heiangi ange i gilaadeu ne dahi i Jerusalem i ugu mua; gai gu laumalie dogu heiangi ma dogu iloo mee.”*

¹⁷ Gai au ne hai gi donu ange au gi dagodo o de heiangi ma de senga aama de lodo senga; aagai au gu iloo hagi, bolo de mee nei e bei de ngadi doolohi a dahi de madangi.

¹⁸ Gai de heiangi laumalie e hai hagi ga kona de manavasaa lodo o tangada; gai de iloo mee laumalie e hai ga kii ange de daemaha ono lodo.

2

De hai oo mee e lodo ai e deai ono haigamaiana

¹ Au ne hagamadaba i ugu lodo, “Humai, au ga hagatale nei goe i denga mee hagamalangilangi e tilo ai be se aha e danuaa.” Aagai tilo, de mee nei e deai hagi ono haigamaiana.

² Au ne hagamadaba, “De gadagada o tangada se lodo senga donu, gai se aha naa donu e kii ange ai?”

³ Au ne maanadu hagi de hai gi malangilangi au i de unu uvaini ma de hagatale de hai hegau i de lodo senga — gai agu hagasaele goi dahi donu huu au i de heiangi. Au ne lodo e tilo be se aha e haigamaiana de hai a dangada i henua i lalo, i laangi sogoisi olaadeu e mouli ai.

* 1:16 1 Ki 4.29-31

⁴ Au ne hai denga hegau nnui: au ne hagatuu ogu hale, ma de doo agu veelengaa *grape*.*

⁵ Au ne hai denga veelenga ma mommee hagdahaao ga doo ai denga hagdahaagangaa manu ssomo iai hua.

⁶ Au ne hai denga mommee hhao vai e hagamaluulu ai denga manu ssomo lagolago.

⁷ Au ne hagao denga daane ma haahine hai hegau, gai ne soa dangada hai hegau ne haanau i dogu hale. Agu kaau ma agu ssiibi ma guudi e lagolago ange i manu a dangada nogo nnoho i Jerusalem i mua.*

⁸ Au ne hagabudu hogi denga selevaa ma goolo lagolago, ma goloa hagamogomogo o denga hodoologi ma denga vaaenga. E hanu hogi ogu daane ma haahine daahili, ma ogu bodu laa daha, go mee o taane e lodo ai.*

⁹ Gai au ne hagdahaagadaga age ma de maolunga ange i gilaadeu nogo i Jerusalem i mua. Gai dogu heiangi goi dagodo donu huu.*

¹⁰ Au ne hai mee alodahi aagu ne gidee ma de lodo ai;

Teai donu se mee oogu ne lodo ai aagu tee hai.

Gai au ne malangilangi i hegau alodahi aagu ne hai,

deenei de hagaoanga o agu hegau alodahi ne hai.

¹¹ Gai ga noho huu au ga tilo mee alodahi aagu ne hai

ma mee alodahi aagu ne hai hegau ange aagena,

* **2:4** 1 Ki 10.23-27; 2 Ch 9.22-27 * **2:7** 1 Ki 4.23 * **2:8** 1 Ki 10.10, 14-22 * **2:9** 1 Ch 29.25

gai tilo, mee alodahi e deai donu olaadeu haigamaiana,
 gai e bei de ngadi doolohi a tangada de madangi;
 e deai donu haigamaiana o mee i lalo de laa.

De heiangi e deai ono haigamaiana

¹² Gai au ne maanadu dagodo o de heiangi
 ma de senga aama de lodo senga.

Ni aha ange naa donu a tangada e gaavee tuulanga
 o de hodoologi

e maua i de hai gi kii ange i mee gu lava i de hai?

¹³ Au gu gidee bolo de heiangi e danuaa ange i de
 lodo senga,

gai e bei ai hogi, de maalama e danuaa ange i de
 gohu.

¹⁴ Tangada heiangi e hanu ono ganomada e tilo ai,
 gai tangada lodo senga e seese i lo te gohu;
 aagai au gu donu ange bolo gilaau ngaadahi
 e tuu ange naa gi de mee daudahi.

¹⁵ Gai au ne maanadu i ogu lodo,

“De mee e duu ange gi tangada lodo senga
 e duu mai naa hogi gi de au.

Gai ni aha ai naa aagu e mau i dogu heiangi?”

Au e hagadaba i ogu lodo,

“E deai hogi haigamaiana o de mee nei.”

¹⁶ Tangada heiangi e bei naa hogi dagodo o tan-
 gada lodo senga,

e dee daulooloa naa donu de hagamanadua dan-
 gada ia;

dangada e ngalo naa gilaau ngaadahi i muli mai.

Tangada heiangi e magau naa hogi bei tangada
 lodo senga!

De hai hegau e deai ono haigamaiana

17 Au ne kino i de mouli nei, go hiidinga hegau alo-dahi e hai i lalo de laa e hagadaemaha mai gi de au. Mee alodahi e deai donu olaadeu haigamaiana, gai e bei de ngadi doolohi a tangada de madangi.

18 Au ne kino i mee alodahi oogu gu hai hegau aagena i lalo de laa, go hiidinga au e dugu ange naa mee alodahi gi dahi dangada i ogu dua.

19 Gai goai e iloo be ia se dangada heiangi, aabe se dangada lodo senga? Aagai go ia naa e huahua i mee alodahi aagu ne hagaduu ngae ga hai hegau ange aagena i ogu mahi aama dogu labagau i lalo de laa. De mee nei e deai hogi ono haigamaiana.

20 Au ne mmade ange hogi ogu aalanga i dagu maanadu agu hegau alodahi ne hagaduu ngae ga hai i lalo de laa.

21 Tangada e hai hegau laa i de heiangi ma de iloo mee, aama dono labagau, gai ia e dugu ange naa ana mee alodahi gi tangada tee hagadalea ange laa aagena. De mee nei e deai hogi ono haigamaiana gai e dee se mee danuaa.

22 Gai se aha a tangada e mau i dono hagaduu ngae ga hai hegau i lalo de laa?

23 Taulooloa ono laangi e mouli, gai ia e mmae ma de daemaha ono lodo; ono lodo e dee maua hogi gi mabu i de boo. De mee nei e deai hogi ono haigamaiana.*

24 Gai e deai ange donu se mee e danuaa ange gi tangada, gai go de gaimee ga unu ma de malangilangi i ana hegau. Au ne gidee hogi bolo de mee nei se mee mai i daho de Maadua,*

* 2:23 Job 5.7; 14.1 * 2:24 Ecc 3.13; 5.18; 9.7; Luke 12.19; 1 Co 15.32

²⁵ gai e deai donu se dangada e maua i de gaimée ga malangilangi noo e dee dugu mai i ono daha.

²⁶ Gai de Maadua e gaavange gi tangada e haga-malangilangi ina ia de heiangi, ma de iloo mee aama de malangilangi; aagai ia e hai tangada haisala gi hagabudulia ma de doange dono lava, e gaavange gi tangada e haia mee o de Maadua e lodo ai. De mee nei e deai hogi ono haigamaiana, gai e bei de ngadi doolohi a tangada de madangi.*

3

E dahi donu masavaa o mee alodahi

¹ E dahi masavaa ange gi mee alodahi, gai e dahi donu masavaa ange gi mee alodahi i henua i lalo;

² e dahi masavaa e haanau ai, gai e dahi hogi masavaa e maakau ai; e dahi masavaa e doo ai manu, gai e dahi hogi masavaa e unuunusi age ai;

³ e dahi masavaa e daa ai gi maakau, gai e dahi hogi masavaa e hagaieiangi ai; e dahi masavaa e oha ai, gai e dahi hogi masavaa e hagaduu age ai;

⁴ e dahi masavaa e tangi ai, gai e dahi hogi masavaa e kada ai; e dahi masavaa e hinangalosaa ai, gai e dahi hogi masavaa e aanu ai;

⁵ e dahi masavaa e hagasii saele ai denga hadu, gai e dahi hogi masavaa e hagabudu ai denga hadu;

e dahi masavaa e hagadau buuludi ai,

* **2:26** Job 32.8; Pro 2.6

gai e dahi hogi masavaa e tuu ai de hagadau
buuludi;

⁶ e dahi masavaa e ssala ai gi gidee,
gai e dahi hogi masavaa e tuu ai de ssala,
e dahi masavaa e doange ai,
gai e dahi hogi masavaa e tili ai;

⁷ e dahi masavaa e saesae ai,
gai e dahi hogi masavaa e dui ange ai;
e dahi masavaa e dee mmuu ai,
gai e dahi hogi masavaa e pasa ai;

⁸ e dahi masavaa e hagadau aaloha ai,
gai e dahi hogi masavaa e hagadau kino ai;
e dahi masavaa e hebagi ai,
gai e dahi hogi masavaa e nnoho paba ai.

⁹ Gai se aha naa a tangada e mau i ana hegau
kona e hai?

¹⁰ Au gu gidee de hegau daemaha a de Maadua
gu hagenda ange gi hongaga o dangada.

¹¹ Ia gu hai mee alodahi gi mahamaha i dono
masavaa. Ia gu hai gi iloo e dangada de masavaa e
dee ngado mai, aagai gilaadeu tigi maua i de tonu
ange gi mee a de Maadua gu hai mai i taamada ga
dae ai gi de hagaodi.

¹² Au e iloo bolo e deai ange donu se mee e
danuaa ange gi dangada, gai go malangilangi ma
de hai tanuaa i de masavaa olaadeu e mouli ai.

¹³ Dangada alodahi gi gaimee ma de unu aama
de malangilangi i alaadeu hegau ne hagaduu ngae
ga hai; de mee nei se mee ngadi gaamai i daho de
Maadua.

¹⁴ Au e iloo bolo mee alodahi a de Maadua ne
hai e daakodo naa donu ga hano ai; e deai donu
mee e maua i de hagapuni ange aabe go de kave

gee ai. Gai de Maadua ne hai gi dagodo bee nei, gi maatagu ai dangada i de ia.

¹⁵ Mee e hanu iainei gu hanu huu i mua, gai mee e loomai, gu lava donu i de hai i mua; gai de Maadua e ahe ange ma e hai mee gu hai i masavaa gu hulo.

De hagamodu dee heohi o de mouli nei

¹⁶ E dahi ange agu mee ne gidee i lalo de laa: de mommee iai de hagamodu heohi, gai iai hogi de baubau; de mommee iai de mee heohi, gai de baubau i kilaa hogi.

¹⁷ Au ne hagadaba i ogu lodo, “De Maadua e hagamodu naa muna o tangada heohi ma tangada baubau, go hiidinga e dahi masavaa ange gi mee alodahi, ma hegau alodahi.”

¹⁸ Au ne hagadaba bolo de Maadua e hagatale dagodo lodo o dangada, gi gidee ai e gilaadeu bolo gilaadeu e bei dagodo o denga manu dolodolo.

¹⁹ Gai de hagaodi o tangada ma de hagaodi o denga manu dolodolo e dagodo daudahi donu huu; gilaadeu alodahi e maakau naa. Gai se dagodo daudahi delaadeu hai e manamanava ai; tangada e dee kii ange i denga manu. Mee nei alodahi e deai donu olaadeu haigamaiana.

²⁰ Alodahi e hulo gi de mommee daudahi; alodahi ne daamada mai i de gelegele, gai e aahe ange naa hogi gi de gelegele.

²¹ Goai e iloo be de hagasaalunga o tangada e hanage gi lunga, gai de hagasaalunga o de manu e hano iho gi lo te gelegele?

²² Gai au gu gidee bolo de mee donu huu e danuaa ange gi tangada go dono malangilangi i de hai ana hegau, go hiidinga deenei dono duuhanga. Gai goai e maua i de hagahe mai ia gi diiloo mee e hai i dua dono magau?

4

Hanu hagadaangaa mee hai ngadaa

¹ Gai au ne ahe ange hogi ga tilo de vaivai haia o dangada i lalo de laa.

Au ne gidee loimada o dangada e vaivai haia, gai e deai dangada e hagaaneane ina gilaadeu. Ssauaa gu gaavange gi gilaadeu e vaivai haia dangada;

gai e deai donu se dangada e balea ange gilaadeu.

² Au ne tuhi de gau maakau, go gilaadeu gu maakau odi laa, gilaadeu e malangilangi ange i gilaadeu goi mouli.

³ Aagai tangada e danuaa ange i gilaau ngaadahi go tangada tigi haanau laa, ia tigi gidee denga hegau baubau e hai i lalo de laa.

⁴ Au ne gidee hogi bolo hegau alodahi ma denga hegau labagau alodahi ne hai i hiidinga de lodo gaiaa o tangada i tangada ange laa. De mee nei e deai hogi ono haigamaiana, gai e bei de ngadi doolohi a tangada de madangi.

⁵ Tangada lodo senga e ngadi noho donu huu ga hagapogo luono lima, ga hagahiigai ai donu huu ia.

⁶ De lima e honu laa i de noho baba, e danuaa ange i lodo luu lima e hoohonu laa i denga hegau kona,

ma de ngadi doolohi a tangada de madangi.

⁷ Au ne gidee ange hogi hanu mee deai olaadeu haigamaiana i lalo de laa:

⁸ E dahi dangada e noho sogosogo,

e deai sana dama daane be se daina daane.

Gai e dee maua donu gi lava ana hegau e hai,

gai ia e dee maua hogi gi malangilangi i dono lava.

Gai ia e hagadaba, “Goai donu oogu e hai hegau

kona ange nei aagena,

gai gu aha gu dee hai ai nei donu huu au de mee e

danuaa mai gi de au?”

De mee nei e deai hogi ono haigamaiana, gai se

hegau hagadaemaha!

⁹ Dogolua dangada e danuaa ange i dahi dangada sogosogo,

go hiidinga e lagolago ange alaau mee e mau i alaau hegau ngaadahi.

¹⁰ Gai noo dahi gilaau gu baguu,

gai dono soa e maua i de bale ange ia.

Aagai e hagaaloha tangada e baguu laa,

gai e deai donu se dangada e hagahidi age ia!

¹¹ E bei ai hogi, noo e dogolua dangada e hebaa ma e daakodo ai,

gai gilaau e mahanahana.

Aagai dee hee de hai o dahi dangada sogosogo

e maua ai gi mahanahana?

¹² Tangada sogosogo e maua gi hagadee kii ina,

gai e dogolua dangada e maua i de buibui gilaau.

Taula e dua dolu laa e dee moolau de modu.

¹³ Tama daane hagaau aloha heiangi e danuaa ange i dahi hodooligi madumadua lodo senga gu

dee maua laa i de hagallongo dahi muna e hagakana ange,

¹⁴ e dee galemu be tama daane laa ne sao mai i lo te hale pono ga hodoologi, aabe ia ne haanau i dono nohoanga hodoologi ga hagaau aloha.

¹⁵ Au ne gidee bolo alodahi e mouli laa ma de seese i lalo de laa ne daudali ange i dahi gauligi, go de ia ne gaavee tuulanga o de hodoologi.

¹⁶ Gai e soa dangada aana e dagi. Aagai dangada e loomai i ono dua e dee malangilangi i de ia. Ni muna abodonu, de mee nei e deai hogi ono haigamaiana, gai e bei de ngadi doolohi a tangada de madangi.

5

Madagu i de Maadua

¹ Dagidiiloo au mee e hai i doo masavaa e ulu ai i de hale o de Maadua. E danuaa ange noo koe e hano ga hagallongo, i doo hano ga hai ssigidaumaha a de gau llodo senga, go gilaadeu e dee iloo bolo alaadeu mee e hai e dee heohi.

² Aude hagamoolau gi daalaa hanu muna i doo ngudu,

aude hagamoolau gi daalaa hanu ngadi muna i oo lodo

i mada luu mada o de Maadua.

Go hiidinga de Maadua e noho i de langi,

gai koe i henua i lalo,

deelaai, haia gi dee lagolago au muna e tala.

³ De midi e hidi mai i de lagolago hagasaele, gai e bei ai hogi, tangada lodo senga e lagolago ana muna.

⁴ Noo koe gu hagatoo donu ange gi de Maadua i dahi mee, gai koe hagamoolau haia gi bei, go hiidinga ia e dee malangilangi i de gau llodo ssenga; hagasula ina dau hagatoo donu.*

⁵ E danuaa ange dau dee hagatoo donu i dahi mee, i dau hai dahi hagatoo donu aagai koe e dee hai gi bei.

⁶ Koe gi dee haisala i au muna e tala. Gai koe gi dee hai baasi ange gi tangada e daalaa muna a de Maadua,* “Ne haisala dagu mee ne hagatoo donu ai.” Ni haigamaiana aha dau hai gi lili de Maadua i au muna, ga hidi mai ai dana oha au hegau alodahi gu hai?

⁷ Midi lagolago ma ngadi muna lagolago e deai donu olaadeu haigamaiana. Aagai koe gi madagu i de Maadua.

Goloa lagolago e deai olaadeu haigamaiana

⁸ Koe gi dee lele oo mouli i dau gidee de vaivai haia o de gau hagaau aloha i dahi ungaamee, ma teai se hagamodu heohi ma heohi o dangada; go hiidinga dahi dagi maolunga e dagitilo tagi i ono lalo, gai denga dagi i olaau elunga e dagitilo gilaau.

⁹ Hua e maua i de gelegele e haigamaiana ange gi dangada alodahi; gai e haigamaiana ange hogi gi de hodoologi.†

¹⁰ Be goai e lodo i denga sseene e dee maua donu gi malangilangi i ana sseene e mau; gai tangada e lodo i goloa lagolago e dee maua hogi gi malangilangi i mee aana e hanu.

* **5:4** Psa 66.13-14 * **5:6** *tangada e daalaa muna a de Maadua*, aabe go *tangada de langi*. † **5:9** Muna Hebrew i de gubu nei e dee iloo danuaa dono hagadoonunga.

De mee nei e deai hogi ono haigamaiana.

¹¹ De masavaa naa huu e lagolago ai mee danuaa, gai gu soa hogi dangada e gaina.
Gai ni haigamaiana aha ange ai gi tangada niiana, e dee go dana gidee donu huu i luono mada?

¹² Tangada hai hegau e seni danuaa, e dee galemu be ne momo aabe ne lagolago ana mee ne gai,
aagai goloa lagolago o tangada lava e hai ma e dee maua e ia i de seni.

¹³ Au gu gidee ange dahi mee hagadaemaha baubau i lalo de laa:
de lava a tangada e hagabudu laa ga dugu e hagadaemaha donu huu ia,

¹⁴ aabe de lava ne ngadi odi laa i dahi hai ngadaa, gai noo gu dahi ana dama daane, gai gu deai donu ana mee e doe ange gi de ia.

¹⁵ Tangada ne gilisau donu huu ga haanau mai ai i daho dono dinana,
gai e bei ai hogi dono hai e magau ai.
Ia e dee kave naa donu dahi mee daudahi oona gu hai hegau ange laa aagena.*

¹⁶ De mee nei se mee hogi hagadaemaha baubau: De hai o tangada ne humai ai, go dono hai hogi e hano ai,

gai ni aha naa a tangada e mau
gai ia e ngadi doolohi de madangi?

¹⁷ De masavaa oona e mouli ai gai ia ne gaimee i lo te gohu,
ia ne daemaha mmao, ma de duasala aama de lili.

* **5:15** Job 1.21; Psa 49.17; 1 Ti 6.7

¹⁸ Tilo, au gu gidee bolo de mee danuaa ma de heohi go de gaimée ma de unu o tangada, ma de malangilangi i ana hegau alodahi e hai i lalo de laa, i denga laangi sogoisi a de Maadua gu dugu ange e mouli ai ia; deenei dono duuhanga.

¹⁹ E dahi ange mee: tangada a de Maadua gu gaavange de lava ma goloa lagolago, ma de hai gi maua e ia i de hagadanuaa i mee laa, ia gi gaavee dono duuhanga ma de malangilangi i ana hegau — de mee nei se ngadi gaavange mai i daho de Maadua.

²⁰ Gai ia e dai dee maanadu donu laangi o dono mouli, go hiidinga de Maadua gu hai gi honu dono malangilangi.

6

¹ E dahi hogi mee baubau aagu gu gidee i lalo de laa, gai e hagadaemaha ange gi dangada:

² noo de Maadua e gaavange gi tangada de lava, ma goloa lagolago aama de hagadubu, gai gu deai donu se mee daudahi oona e duasala ai, aagai de Maadua e dee dugu ange ia gi hagadanuaa i mee nei, gai se dangada gee donu e hagadanuaa ai. De mee nei e deai hogi ono haigamaiana, gai se mee hagadaemaha baubau.

³ Noo tangada e hagadili e lau dama ma de mouli i ngadau lagolago, gai ga daulooloa naa donu dono mouli, gai noo ia e dee maua gi malangilangi i mee danuaa o de mouli nei, gai teai hogi dangada ne danumia ia, gai au e hagadaba bolo tama ssege e danuaa ange i de ia.

⁴ Go hiidinga teai haigamaiana dono haanau ga lava ga hano i lo te gohu, gai dono ingoo gu haolia i de gohu.

⁵ Gai tee gidee donu e ia de maalama o de laa aabe ne iloo e ia hanu mee, gai ia e mabu ange i taane laa,

⁶ e dee galemu donu taane laa e mouli i e mano ngadau, aagai ia tee maua gi dae ono lodo i mee danuaa. E aha, e dee se mommee daudahi o dangada alodahi e hulo laa aagena?

⁷ Hegau alodahi a tangada ni mee e ssala ai ana gai, gai ia e dee maua donu gi bosu ai.

⁸ Gai se aha o tangada iloo mee e kii ange ai i tangada lodo senga? Gai se aha o tangada hagaau aloha e mau, i dana iloo dono hai e ngalungalue ai i magavaa o dangada?

⁹ E danuaa ange doo malangilangi i au mee e gidee, i doo galo ange gi mee e deai i oo daha. De mee nei e deai hogi ono haigamaiana, gai e bei de ngadi doolohi a tangada de madangi.

¹⁰ Mee e hanu gu hanu donu olaadeu ingoo, gai dagodo o tangada gu iloo huu i mua; gai e deai donu se dangada e maua i de hagdamee ange gi tangada e mmahi ange laa i de ia.

¹¹ De lagolago muna a tangada e tala, gai e kii ange hogi teai olaadeu haigamaiana; gai ni aha ai naa a tangada e maua i mee nei?

¹² Gai goai e iloo be se aha e danuaa ange gi tangada i dono mouli, i laangi momo ma teai haigamaiana oona e mouli ai nei, gai e moolau de

odi bei dagodo o de goohunga? Gai goai e maua i de tala ange gi de ia be ni aha e hai i lalo de laa i dua dono magau?

7

De heiangi ma de lodo senga

- ¹ De ingoo hagadeledele danuaa e danuaa ange i mee hagamanongi danuaa, gai de laangi o tangada e magau ai e danuaa ange i dono laangi ne haanau ai.*
- ² E danuaa ange doo hano gi de hale o de hinangalosaa i doo hano gi de hale e hai ai taonga, go hiidinga de magau go de hagaodi o dangada alodahi; gai dangada e mouli gi daohia de mee nei i de lodo.
- ³ De hinangalosaa e danuaa ange i de gadagada, go hiidinga doo lodo baubau e hai ga heiangi oo lodo.
- ⁴ De gau heiangi e maanadu de mommee o de magau, aagai de gau llodo ssenga e maanadu de mommee hagamalangilangi.
- ⁵ E danuaa ange dau hagallongo de hagasee a tangada heiangi goe, i dau hagallongo taahili a de gau llodo ssenga.
- ⁶ De kada o de gau llodo ssenga e bei de babaa o denga laagau iai mee duiduia i lo te ahi. De mee nei e deai hogi ono haigamaiana.
- ⁷ De gaiaa o tangada heiangi e hai ia ga se dangada lodo senga,

* 7:1 Pro 22.1

gai de ngadi gaavange hagasenga e hai ga hakino
gee maanadu a tangada.

8 De hagaodi o dahi mee e danuaa ange i dono
daamada,
de golomagi lodo e danuaa ange i de lodo maol-
unga.

9 Koe gi dee moolau doo lili;
go hiidinga de lili e dagodo i lodo o tangada lodo
senga.*

10 Koe gi dee hagamada, “Gu aha gu danuaa ange ai
laa denga laangi i mua i laangi nei?”
Go hiidinga e dee ni muna ssili mai i de iloo mee.

11 De heiangi se mee danuaa, e bei ai hogi de
boolonga o tangada,
gai se mee haigamaiana ange gi dangada goi gidee
de laa.

12 De heiangi se buibui niio tangada,
gai e bei ai hogi denga sseene,
aagai deenei de haigamaiana o de iloo mee:
de heiangi e hagaola de mouli o tangada e heiangi
laa.

13 Hagasaelea age muhuu dagodo hegau a de
Maadua gu hai:
goai e maua i de hagasoe de mee aana gu hai gi
bigo?

14 Malangilangi i de masavaa ouu e duadonu ai,
aagai koe gi donu iho i de masavaa o de hai
ngadaa:
go de Maadua ne haia luu mee nei ngaadahi.
Deelaa ai, tangada e dee maua gi iloo dagodo o
dono mouli i de masavaa e humai.

* 7:9 Jms 1.19

15 Dogu noho i de mouli deai nei ono haigamaiana, gai au gu gidee luu mee nei ngaadahi: tangada heohi e magau gai ia e hai hegau i de heohi, gai tangada baubau e daulooloa dono mouli gai ia e hai de baubau.

16 Koe gi dee gona odi doo heohi, aabe gi haia gi gona odi doo iloo mee — gu aha goe gu daa ai donu huu goe gi magau?

17 Koe gi dee gona odi doo baubau, gai gi dee se dangada lodo senga — gu aha gu magau ai goe i mua doo masavaa?

18 E danuaa dau daohi dahi mee nei, aagai e dee tili de mee ange laa; go hiidinga tangada e madagu i de Maadua e maua i de hai mee nei alodahi.

19 De heiangi e hai tangada heiangi gi mmahi ange i e dinoangahulu dahi o dahi aduhale.

20 Ni muna abodonu, e deai donu se dangada heohi i henua i lalo e haia de mee heohi e dee haisala.

21 Koe gi dee anga ange gi muna alodahi a dangada e tala, kana langona e goe muna a doo dangada hai hegau e basa hagamalaia i de goe;

22 gai koe e iloo bolo gu lagolago hanonga aau ne basa hagamalaia ai i de gau ange laa.

23 Mee nei alodahi gu lava i dagu hagatale ange i dogu heiangi; gai au ne hagadaba, “Au ne hagaduu ngae e hai gi heiangi au,” — aagai au tee maua.

24 De heiangi e mmao gee donu, e gelo ma de gelo mmao;

gai goai e maua i de ssala gi gidee?

²⁵ Au ne hagamahi gi donu ange au,
ma de ssala gi maua de heiangi ma ono dagodo,
ma de hai gi donu ange au gi de baubau o de lodo
senga
ma de lodo senga e haia laa ga senga tangada.

²⁶ Gai au gu gidee de mee e kii ange de mmala i de
magau:

go de hine e bei laa dagodo o ssele ma galauna,
gai luono lima e bei denga seeini.
Gai tangada e madagu i de Maadua e ola mai naa
i ono daha,
aagai tangada haisala e noodia naa i ssele laa.

²⁷ E hagdaba Tangada Agoago, “Tilo, deenei dagu
mee gu gide.

Au ne hagabunibuni agu mee ne gidee
gi donu ange ai au gi dagodo o mee nei —

²⁸ de masavaa aagu ne ssala ai,
gai au tigi gidee donu —
gai au ne gidee dahi daane heohi i magavaa o e
mano daane,
aagai teai donu se hine heohi i olaadeu magavaa
alodahi.

²⁹ Tilo, deenei dagu mee ne gidee:
de Maadua ne hai dangada gi heohi,
aagai dangada e ssala denga hagdagaangaa ha-
gatau.”

8

¹ Goai e bei dagodo o tangada heiangi?

Gai goai e iloo de hagdagoonunga o dahi mee?
De heiangi e hai ga maalama luu mada o tangada,
ma de sui gi dee dagodo lili luono mada.

Hagallongo ange gi de hodooligi

² Au e hai adu: hagallongo ange gi muna a de hodooligi, go hiidinga koe gu hai dahi hagatoo donu i mada luu mada o de Maadua.

³ Koe gi dee hagamoolau gi hano gee mai i mada i mua o de hodooligi. Koe gi dee balea ange dangada e haia de baubau, go hiidinga de hodooligi e hai ono mee e malangilangi ai.

⁴ De muna a de hodooligi e sauua, gai goai e maua i de hai ange gi de ia, “Ni aha aa e hai naa?”

⁵ Tangada e daudali i de hainga, e dee hagammae donu,

gai tangada heiangi e iloo de masavaa heohi ma dono hai e hai ai.

⁶ Go hiidinga e dahi masavaa heohi ma de hai e hai ai mee alodahi,

e dee galemu donu de hai ngadaa ange gi tangada.

⁷ Ia e dee iloo be ni aha e hai i laangi e loomai nei, gai goai ai naa e daalaa ange gi de ia be ni aha gu hai?

⁸ E deai donu se dangada e dahi ono sauua e daohi ai de madangi,

gai e deai hogi se dangada e dahi ono ssauua

e daohi ai de laangi oona e magau ai.

E deai se dangada e dugu gi hano i de masavaa o de hebagi,

gai e bei ai hogi, de baubau e dee dugu gi hulo gilaadeu e hai hegau ai.

⁹ Au ne gidee mee nei alodahi i dagu hagammahi gi donu ange au gi mee alodahi e hai i lalo de laa. Dahi dangada e dagudagu ange mee a dahi dangada gee e hai ga hagammae ai donu huu ia.

¹⁰ Au ne gidee hogi de danu o de gau baubau — go gilaadeu e dee modu laa de aheahe mai gi de aduhale dabu, ma de tuhi a dangada i de aduhale i delaadeu hai de mee nei. De mee nei e deai hogi ono haigamaiana.

¹¹ De masavaa naa huu e dee hagaduasala ai tangada i de masavaa moolau, i ana hegau baubau, gai lodo o dangada gu nnoho ai naa donu huu e hai de baubau.

¹² Gai e dee galemu donu tangada baubau e haia laa mee dee heohi i e lau hanonga gai e daulooloa donu dono mouli, gai au e iloo bolo gilaadeu e maatagu i de Maadua e danuaa ange olaadeu dagodo, gilaadeu e hagadubu de Maadua.

¹³ Gai go hiidinga de gau baubau e dee maatagu i de Maadua, gilaadeu e dee duadonu, gai olaadeu mouli e dee daulooloa, bei dagodo o de goohunga e moolau laa de lilo.

¹⁴ E dahi ange mee e hai i henua i lalo, e deai ono haigamaiana: gilaadeu e heohi e hagaduasala bei de gau baubau, gai de gau baubau e manuuia bei gilaadeu e heohi. Au e hagadaba bolo de mee nei e deai hogi ono haigamaiana.

¹⁵ Au e hai ange gi dangada gilaadeu gi malangilangi, go hiidinga e deai ange donu se mee e danuaa i lalo de laa, gai go de gaimee ma de unu ga malangilangi. Gai ia e malangilangi naa i de hai ana hegau i taulooloa ono laangi a de Maadua e gaavange gi de ia i lalo de laa.

¹⁶ De masavaa aagu ne ssala ai gi iloo au i de heiangi ma de tilo hegau kona a tangada i henua i lalo — gai ia e dee seni donu i de laangi ma de boo

¹⁷ au ne gidee hogi mee alodahi a de Maadua ne hai. Gai e deai se dangada e donu ange gi mee e hai i lalo de laa. Gai e dee galemu donu dana hagatale de ssala gi donu ange ia, gai e dee maua gi gidee. Gai ga hagamada naa donu tangada heiangi bolo ia e iloo, gai ia e dee maua donu gi donu ange gi mee nei.

9

De hagaodi o dangada alodahi

¹ Au ne hagasaele mee nei alodahi ga hagamada bolo gilaadeu e heohi ma gilaadeu e heiangi, aama alaadeu hegau, go de Maadua e hagasauaa ina. Gai e deai donu se dangada e iloo be go de aaloha aabe go de kino e gaavange gi de ia.

² Gai de hagaodi o dangada alodahi se dagodo daudahi — tangada heohi ma tangada baubau, tangada danuaa ma tangada dee heohi, tangada gilimalali ma tangada e dee gilimalali ono lodo, tangada e haia sigidaumaha ma tangada e dee haia sigidaumaha.

Mee e hai ange gi tangada danuaa,
e hai ange hogi gi tangada haisala;
gai gilaadeu e haia hagatoo donu
e bei hogi gilaadeu e dee hagatoo donu.

³ Deenei de mee baubau e hai i mee alodahi e hai i lalo de laa: de hagaodi o dangada alodahi e dagodo daudahi donu huu. E dahi ange mee, lodo o dangada e hoohonu i de baubau, gai de llodo ssenga e dagodo i olaadeu lodo i de masavaa olaadeu e mouli ai, gai muli mai gilaadeu e hulo gi daho de gau maakau.

⁴ Tangada goi mouli laa e dahi donu ana tali, gai de gaaduu goi mouli laa e danuaa ange i de laiono gu magau laa!

⁵ Gai dangada goi mouli laa e iloo bolo gilaadeu e maakau naa donu, aagai de gau maakau e deai donu alaadeu mee e iloo;

e deai ange donu olaadeu hagaoanga, gai dangada gu dee manadua hogi gilaadeu.

⁶ Olaadeu aaloha, delaadeu kino ma delaadeu lodo gaiaa gu llilo odiodi, gai e deai ange naa donu selaadeu diba i dahi mee e hai i lalo de laa.

⁷ Hannoo, gaina au gai ga malangilangi, ma de unu au uvaini ga lodo danuaa, go hiidinga de Maadua e malangilangi i dau hai mee nei.

⁸ Gahu i malo tea, gai hagasulu ina doo biho i lolo i masavaa alodahi.

⁹ Koe gi malangilangi madali doo bodu, go de ia oou e aloha ai, i laangi alodahi e deai haigamiana, a de Maadua gu gaavadu i doo mouli i lalo de laa, go hiidinga deenei doo duuhanga i de mouli nei, ma au hegau i lalo de laa.

¹⁰ Be ni aha naa huu aau e gidee e hai, gai koe hagaduu ngae haia, go hiidinga de mommee o de gau maakau, go de mommee oou gu dai hano naa aagena, e deai donu hegau e hai ai, e deai hogi hagatau, be se iloo mee aabe se heiangi.

¹¹ Au ne gidee ange dahi mee i lalo de laa: de saavini houhou e dee se mee ange donu huu gi tangada gemo, taua e dee se mee ange donu huu gi tangada mmahi;

denga gai e dee ni mee ange donu huu gi tangada
 heiangi,
 gai de lava e dee se mee ange donu huu gi tangada
 iloo mee,
 gai de abodonu e dee se mee ange donu huu gi
 tangada gu agoagona;
 aagai de masavaa ma mee e hai ni mee ange gi
 gilaadeu alodahi.

¹² E dahi ange mee: e deai donu se dangada e iloo
 dono masavaa:
 de mamu e buulou i lo te galauna baubau,
 gai de manu lele e noodia i dahi sele,
 gai e bei ai hogi dangada e gaavee i denga masavaa
 baubau
 e daa hagalele laa donu huu de dae mai gi gilaadeu
 alodahi.

De heiangi e danuaa ange i de lodo senga

¹³ Au gu gidee hogi ma de lele ogu mouli i de
 hagadagodo o de heiangi i lalo de laa.

¹⁴ E dahi damaa aduhale e sogoisi dangada iai.
 Gai dahi hodooligi mmahi ne humai e hebagi ange
 aagena, ia ne duuli luu baasi ma de hagatuu denga
 mee e oha ai de aduhale laa.

¹⁵ Gai e dahi daane hagaau aloha gai e heiangi e
 noho i kilaa, ia ne hagaola de aduhale laa i dono
 heiangi. Aagai teai donu se dangada ne manadua
 taane hagaau aloha laa.

¹⁶ Gai au e hagadaba bolo de heiangi e danuaa
 ange i de mmahi, e dee galemu donu de heiangi
 o taane hagaau aloha ne hagangadi mee ina e
 dangada, gai dangada e deai anga ange gi ana
 muna.

¹⁷ Muna a tangada heiangi e musumusu,

e heohi donu dau hagallongo
i muna a tagi o de gau ssenga e oo laa ma e tala.

¹⁸ De heiangi e danuaa ange i denga goloa o de
hebagi,

aagai dahi dangada haisala e oha mee danuaa
lagolago.

10

¹ Denga lango maakau e hai ga pilo de vai haga-
manongi,

gai de lodo senga damaa mee e daemaha ange ono
dagodo i de heiangi ma de hagamadu.

² Lodo o tangada heiangi e dahi ia gi de madau,
aagai lodo o tangada lodo senga e dahi ia gi de
masui.

³ Gai ga seese naa donu tangada lodo senga i
hongade haiava, gai ia e senga,
gai ia e hagaago ange gi dangada alodahi bolo ia
se dangada senga.

⁴ Noo dahi dahi gu lili i de goe, gai koe aude dilia
doo duulanga,
go hiidinga de daudonu e bale de hagaheohi de
haisala laumalie.

⁵ Au gu gidee dahi mee baubau i lalo de laa,
go de baubau e daamada mai laa i dahi dahi dahi:

⁶ denga duulanga maolunga gu gaavange gi de gau
llodo ssenga,

gai denga duulanga maolalo gu gaavange gi de
gau lava.

⁷ Au gu gidee de gau hai hegau i hongade hoosa,
gai denga dahi o de henua e seese, bei de gau hai
hegau.

8 Be goai e gelia dahi geelinga e doo ange naa gi ono lodo,
gai be goai e oohaa dahi buibui e gaadia naa i dahi labodo hagammau.*

9 Be goai e hoda ina denga hadu e lagolagohia naa i denga hadu;
gai be goai e hangahanga ina denga duudangaa laagau e hagammae ina naa i mee nei.

10 Noo de hagadaguu e madagabubu,
gai de mada tigi hakaa,
gai e hai gi mmahi tangada e hai hegau ai;
aagai go de labagau o tangada e haia ga ssula hegau.

11 Noo dahi labodo hagammau e kadi tangada i mua de hai gi dala,
gai e deai donu haigamaiana ange gi tangada e haia gi dala.

12 Muna a tangada heiangi e hai gi malangilangi dangada i de ia,
aagai muna a tangada lodo senga e hhoa donu huu dono lae.

13 Ana muna i taamada ni muna lodo senga;
gai de hagaodi o ana muna e baubau gai e bei muna a tangada senga.

14 Tangada lodo senga e lagolago ana muna e tala.
E deai dangada e iloo be ni aha e hai i muli mai;
gai goai e maua i de tala be ni aha e hai i dua dono magau?

* **10:8** Psa 7.15; Pro 26.27

15 Hegau a tangada lodo senga e hagamalea donu huu ia,
ia e dee iloo de haiava e hano ai gi de aduhale.

16 E vakaa naa de henua noo dono hodoologi se gauligi,
gai ono dagi e hai daonga mai i taiao.

17 E manuuia de henua noo dono hodoologi se dangada aamua abodonu,
gai ono dagi e daonga i de masavaa heohi —
e hagamahi ai olaadeu angaanga, e dee go de unu gi ssenga!

18 Noo tangada e vaiduu, gai laagau o de hale gu pobo,
gai noo tangada e ngadi noho, gai de hale gu vava.

19 Denga gai ne hai gi kada dangada,
gai denga uvaini e hai ga malangilangi tangada,
aagai denga sseene e hai ga maua mee alodahi.

20 Koe gi dee hagamalaia ina de hodoologi i oo lodo,
aabe gi hagamalaia ina tangada lava i lo te aabi oou e seni ai;
go hiidinga dahi manu lele o lo te moana e maua i de kave au muna,
gai dahi manu lele e maua i de hagamalea au muna e tala.

11

Hegau a tangada heiangi

¹ Magaa au pelaoaa gi hongaa tai

gai koe e ahe ange naa ga gidee i dua hanu laangi lagolago.

² Duuhaa ange gai gi e dogohidu aabe e dogovalu dangada,

go hiidinga koe e dee iloo be se hai ngadaa bee hee e humai gi hongang de henua.

³ Noo denga hagausinga gu hagagohu age, gai de langi e pala iho naa donu gi hongang de henua. Noo dahi manu somo e baguu gi ngaage aabe go ngaiho,

gai e dagodo naa donu huu i tuulanga laa.

⁴ Be goai e dagidiiloo de ssau de madangi e dee doo donu dahi manu daudahi; gai be goai e daalia gi loage denga hagausinga e dee hagihagi.

⁵ Koe e dee iloo de hai o de hagasaalunga ne humai ai

aabe go de hai ne hagahale ai denga ivi i lo te dinae o de hine hai dama,

gai koe e dee donu ange hogi gi hegau a de Maadua,

go de ia ne haia mee alodahi.

⁶ Koe gi doo ina au golee i taiao,

gai koe gi dee ngadi noho i de ahiahi,

go hiidinga koe e dee iloo be dee hee de mee e somo,

go de mee nei aabe go de mee ange laa,

aabe go luu mee nei ngaadahi e ssomo.

Manadua de ia ne haia goe

⁷ De maalama e hagamalangilangi, gai tangada e malangilangi i de tilo de maalama o de laa.

⁸ Gai ga lagolago naa donu ngadai o tangada e mouli ai,
gai ia e malangilangi i ngadai alodahi.
Aagai ia gi manadua bolo laangi o de gohu e lagolago naa donu.

Gai mee alodahi e loomai e deai donu haigamaiana.

⁹ Tama daane, koe gi malangilangi i de masavaa ouu e dama daane ai,
gai oo lodo gi malangilangi i laangi ouu e dama daane ai.

Gai haia oo mee e lodo ai i mee alodahi aau e gidee,
gai koe gi iloo bolo de Maadua e hagamodu naa oo muna i mee nei alodahi.

¹⁰ Deenei ai, haia koe gi dee manavasaa,
gai doo angaanga gi deai mee e mmae ai,
go hiidinga de masavaa ouu e mmahi ai e deai donu ono haigamaiana.

12

¹ Koe gi manadua de ia ne haia goe i de masavaa ouu e dama daane ai,
i mua de tae mai o denga laangi hai ngadaa,
ma ngadai aau e hagadaba ai,
“Au e dee malangilangi i laangi laa” —

² i mua de hagagohu o de laa ma de maalama ma de maasina, aama denga heduu;
i mua de aahe o denga hagusanga i dua de pala de langi;

³ ma de masavaa o de gau hagaloosi o de hale e bolebole ai,
gai denga daane mmahi gu gogo gi mua;
de masavaa o denga mee e maamaa ina mee

e dee maua ai i de maamaa, i hiidinga gilaadeu gu
 sogoisi,
 gai gilaadeu e hagaduidui mai i lodo abaaba
 vaaligiligi gu dee gidee;
 4 de masavaa o denga abaaba i de baasi ange gi de
 haiava gu pono;
 gai gu dai dee langona de maamaa mee;
 tangada e aala i de koo o denga manu,
 gai gu dai dee langona taahili o denga damaa hine;
 5 de masavaa olaadeu gu maatagu ai i de mommee
 maolunga,
 gai denga mee hagamaatagu gu hongaa denga ha-
 iava;
 i de masavaa e aala ai hua o de *almond*,
 gai de itebuubuu gu tagi luono vae,
 gai gu deai donu se lodo e hanage i ono lodo; *
 go hiidinga tangada e hano gi dono mommee e dee
 ngado mai,
 gai de gau hinangalosaa e hulo saele i hongaa ha-
 iava;
 6 i mua de modu taula selevaa,
 be go de maoha o de boolo goolo,
 ma de maoha de mee hhao vai i gaogao ssaalingaa
 vai,
 aabe go de maoha o de hagasii i gaogao de vai geli,
 7 gai de mama o de gelegele e ahe ange naa gi de
 gelegele, ne daamada mai ai laa,
 gai de hagasaaalunga e ahe gi dahoo de Maadua ne
 gaavange laa.

Muna hagamogomogo hagaodi

* 12:5 *gai gu deai donu se lodo e hanage i ono lodo*: muna Hebrew i kinei e dee iloo danuaa dono hagadoonunga.

⁸ Tangada Agoago e hagadaba,
“E deai haigamaiana! E deai haigamaiana!
Mee alodahi e deai donu haigamaiana!”

⁹ Tangada Agoago e dee se heiangi donu huu,
aagai ia e agoago ange hogi dangada i de iloo mee.
Ia ne hagasaele ma de ssala gi donu ange ia, ma de
hagamaumau ma de hagatau muna heiangi.

¹⁰ Tangada Agoago ne ssala gi gidee denga muna
e danuaa ma de heohi, gai ana mee ne sisi ni muna
abodonu gai e heohi.

¹¹ Muna a de gau heiangi e bei laagau a tangada
hagaloosi e hagabaa ai laa ana manu, alaadeu
dalaa muna gu hagabudu ma gu daohi e bei denga
neele gu tugi laa ma gu makaga – ni muna nii dahi
dangada hagaloosi ssiibi.

¹² Dagu dama, koe gi kana ange gi dagidiiloo
denga mee laa tua o mee nei.

E deai naa donu se tuu de sisi denga beebaa
lagolago, gai de hagamaumau mee e hagataalea
donu.

¹³ Gidaadeu gu langona mee alodahi;
gai aanei muna hagaodi:
koe gi madagu i de Maadua ma de daohi ana
hainga;
deenei donu de hegau laumalie a tangada e hai.

¹⁴ Go hiidinga de Maadua e hagamodu naa dagodo
o hegau alodahi,
ma mee alodahi ne hai hagamuni laa,
e dee hilihili be danuaa aabe baubau.

De Beebaa Dabu
The Holy Bible in the Nukuoro language of Micronesia
copyright © 2022 Wycliffe Bible Translators, Inc.

Language: Nukuoro

Contributor: Wycliffe Bible Translators, Inc.

All rights reserved.

2025-03-14

PDF generated using Haiola and XeLaTeX on 13 Mar 2025 from source files
dated 14 Mar 2025
8ec6bba8-0c5e-54dd-94ca-afb07f24d254